

烏龍 Sèh 桌

■ 高英男 | 教會執事 ■

「聽」氣象報導講：明仔載鳳山青年路夜市仔會落雪！Beh 趁 siók khioh 大碗 --ê，趕緊倚--過--來，千萬 m̄-thang 跳--過 làng-- 過 o̍h! koh 行，無 khah 贏！腳手 khah 慢--leh，就 nó'-sut--a！今仔日 beh hō 來交關 ê 人 lóng 歡頭喜面、嘴笑目笑行 --tng-去。一領 500 khō' ê jiàn-bà (『夾克』)，eng 暗 beh 賣 lín 50 khō'！真正 khah siók he 蕃薯 khō'！大家 khoaⁿ-khoaⁿ -á-sī，m̄-thang chiⁿ，寸尺、貨色 lóng 真齊，慢慢 á 揀。Bē 記得 chah 錢 -- ê，趕緊 tng 去厝--nih thèh，iah 是去銀行領，iáu 會赴！」叫賣 ê 人放送頭 thèh--leh，硬拚性命 hoah！Kan-taⁿ 看 tiòh 攤仔位頭前，一堆人 chhah-chhah-chhah！有 ê 人 hiahⁿ 四、五領，有 ê 人 hiahⁿ 六、七領，興 chhih-chhih 排隊等 beh 結帳。我 kap 婦 jîn 人真 hòⁿ 玄，mā nng 入去人群內底看 māi 到底是圓 ah 扁。

看著衫頂 koân kat ê 牌仔定價是

4,900，心內暗爽，「Taⁿ chit 聲 báu--死-a！真正 khioh tiòh siók 仔。」我 kap 婦 jîn 人 mā tòe teh 潦--落--去。揀 chiok 久 --ê，真無簡單揀 tiòh 兩領合 su koh kah 意--ê。排隊等結帳 ê 時，聽 tiòh 頭前圍一堆 o̍basang kap 頭家娘 teh òⁿ-òⁿ 嚷。「妳 tú-chiah 明明講一領 50，nah 會 chit-má koh 反起反倒變一領 490--leh？」「喂！O̍basang，請 lín 大家目 chiu peh hō 金，看 hō 清楚，聽 hō 斟酌，阮是講一領 500 khō' ê 衫 beh 賣 50 khō'！這 jiàn-bà 一領定價是 4900 neh！Lín mā khah 拜託--leh！Beh 愛 50--ê，tiòh 去 chhōe 定價 500 khō' --ê，歹勢 hōⁿ！」

阮翁仔某兩個聽了，衫 hē--leh，鼻仔摸摸--leh——「趁 thiòng」無輸贏。Hiah ê o̍basang--leh？「%#@€.....！」是 kiāu 到會牽絲，會 chhoh，chhoh 到 bē-chhoh。🌐